

# TEZĂUR LITURGIC

21 MAI

# ACATISTUL SF. CNEJI CONSTANTIN, MIHAIL ȘI TEODOR DE LA MUROM



MOSCOVA, 2000



# Акафист

**СВЯТЫМ БЛАГОВЕРНЫМ КНЯЗЬЯМ**

**Константину и чадам его**

**Михаилу и Феодору,**

**Муромским чудотворцам**

## Кондак 1

---

Изрядный воеводо Небеснаго Царя, преславный просветителю страны Муромския, благоверный княже Константине, похвальная восписуем ти с чады твоими, Михаилом и Феодором: яко избавив древле люди Муромския от прелести и скверны идольския, и привел их к свету веры Христовой, и ныне посещаеши их своею милостию и заступлением. Сего ради благодарственно вопием ти: Радуйся, преблаженне княже Константине, скорый помощниче и заступниче наш.

---

## Икос 1

Ангелу непорочному, страстотерпцу святому  
Глебу поревновав, пожелал еси неверный Муром  
в княжение себе прияти, да просветиши люди  
седающия во тьме и сени смертней светом  
боговедения. Сего ради вопием ти: Радуйся,  
благочестиваго корене благоцветущая отрасль:

Радуйся, с высотой рода и богатство  
духовных дарований наследивый.

Радуйся, тезоименитому тебе царю  
Константину поревновавый:

Радуйся, святому князю Владимиру  
подражавый.

Радуйся, образ непорочнаго Глеба пред очима  
сердца живописавый:

Радуйся, начатое им дело совершити  
пожелавый.

Радуйся, в юности благословением Феодосия  
осененный:

Радуйся, от младых ногтей благочестию  
наученный.

Радуйся, поклонения идолам истребителю:

Радуйся, неверия и нечестия низложителю.

Радуйся, Евангелия благовестниче:

Радуйся, его же ради вера Господня в стране Муромской возсия.

Радуйся, преблаженне княже Константине, скорый помощниче и заступниче наш.

### **Кондак 2**

---

Видя, вражды ради князей, чести и первенства ищущих, многия страны оставленныя без просвещения святою верою, не суетной славы желая, но трудов и подвигов благоверия веры Христовой взыскуя, возжелал еси Константине княжити в Муроме, да научиши люди неверныя воспевати Богу: Аллилуиа.

### **Икос 2**

---

Разум словес апостольских сердцем уразумеv, яко обративый грешника от пути заблуждения спасет душу, и покрывает множество грехов, потщался еси избрати себе жребий служения апостольскаго в стране Муромстей. Сего ради вопием ти: Радуйся, добрый ревнителю подвигов апостольских:

Радуйся, любве к ближним преисполненный.

Радуйся, свеще, тьму неверия  
просвещающая:

Радуйся, солнце, тину нечестия изсушающее.

Радуйся, неверных люди к Богу приведый:

Радуйся, из недостойнаго честное изведый.

Радуйся, благодати Божией посредниче:

Радуйся, положивый начало новаго бытия  
стране Муромстей.

Радуйся, яко тобою наставляеми поклоняемся  
Истинному Богу:

Радуйся, яко тобою познахом Отца  
Небеснаго.

Радуйся, правителю благий: Радуйся,  
пастырю добрый.

Радуйся, преблаженне княже Константине,  
скорый помощниче и заступниче наш.

### **Кондак 3**

---

Силою свыше Апостолы иногда облекий во  
Иерусалиме сидяция, на дело благовестия их  
уготовляя, чрез благословение святителя и всего  
освященнаго собора и молитвы верных, облече и  
тебе, грядуща на дело проповеди Евангельския,

силою мужественною, да укрепляемый ею в подвиге служения, вопиешу Богу: Аллилуиа.

### **Икос 3**

Имея велию веру и любовь к Пресвятей Богородице, в знамение Ея покрову и заступления, приял еси чудную икону Ея, яко благу Одигитрию, водительствующую тя в пути. Сего ради вопием ти: Радуйся, благу часть избравый: Радуйся, упование на единого Бога возложивый. Радуйся, себе вручивый молитвам церковным:

Радуйся, благословение свыше чрез них приявый.

Радуйся, сильному покрову Богоматере вверивыйся:

Радуйся, честный образ Ея в щит себе и ограждение стяжавый.

Радуйся, не на воинство, но на помощь Божию надеявыйся:

Радуйся, веру Христову с надеждою мудро сочетаваый.

Радуйся, воине Царя Небеснаго:

Радуйся, о умножении Царствия Его пекийся.

Радуйся, земная радости презревший:

Радуйся, благ небесных возжелавый.

Радуйся, преблаженне княже Константине,  
скорый помощниче и заступниче наш.

#### **Кондак 4**

---

Бурею помышлений притрепетных смятесе  
отец твой, блаженне княже Константине,  
помышляя злонравие людей, к нимже княжити  
шел еси, но на благодать Божию уповая,  
благослови тя на подвиг, вопия Богу: Аллилуиа.

#### **Икос 4**

---

Слышав блаженне Константине, яко не  
хотяху невернии людие прияти тя, послал еси  
сына твоего, кроткаго агнца Михаила,  
увещевати непокорныя: они же убиша  
непорочнаго отрока. Мы же, прославляя тя яко  
Авраама, в жертву Богу сына произволением  
приносящаго, вопием ти: Радуйся, кроткий  
подражателю Христов:

Радуйся, добрый исполнителю Его заповедей  
любви.

Радуйся, кротостию злобу побеждай:

Радуйся, врагом твоим добро творяй.

Радуйся, Богу Отцу подражавый:

Радуйся, сына своего не пощадевый для спасения нечестивых.

Радуйся, словом любви учение Бога, иже есть любви, насаждаяй:

Радуйся, свою душу за спасение ближних положить готовый.

Радуйся, возлюбивый Бога и дело Божие паче близких:

Радуйся, яко плоть и кровь не яви ти, но Отец Небесный.

Радуйся, образ кротости духовныя:

Радуйся, незлобия наставниче.

Радуйся, преблаженне княже Константине, скорый помощниче и заступниче наш.

### **Кондак 5**

---

Боготечная звезда явися стране Муромстей князь Михаил, возвещая имеющее возсияти солнце истинныя веры: мученическою бо кровию своею освяти неверную землю, нетлением просия телесе своего, благоуханием его наполни землю, и лики ангел низведе с Небесе, поющих Богу: Аллилуиа.

## Икос 5

Видя сына своего Михаила убиена и извержена из града, и злонравныя люди на брань с тобою уготовляющияся, возопил еси к Щедрому Богу, и услышал еси глас: дерзай Константине, и не бойся, яко власть град получил еси. Темже мы взываем ти: Радуйся, верою мужество укрепляяй:

Радуйся, молитву оружием содеваяй.

Радуйся, яко Давид на Голиафа, на враги во Имя Господа вооруживыйся:

Радуйся, яко Константин на Максентия о силе Креста возмогаяй.

Радуйся, не смерти злодеев, но спасения их возжелавый:

Радуйся, приведения их к Богу искавый.

Радуйся, просвещение омраченных:

Радуйся, исправление развращенных.

Радуйся, умягчение ожесточенных:

Радуйся, нечестия искоренителю.

Радуйся, истинныя веры утвердителю:

Радуйся, благия надежды насадителю.

Радуйся, преблаженне княже Константине,  
скорый помощниче и заступниче наш.

### **Кондак 6**

---

Проповедник богоносный явился еси,  
блаженне, граду Мурому, храмы святыя устроая,  
служение христианское совершая, веру  
возвещая, уча и наставляя старыя и юныя, да  
навыкнут вси воспевати Богу: Аллилуиа.

### **Икос 6**

---

Возсия граду Мурому просвещение истины, и  
отгнася лесь бесовская труды, подвиги и  
молитвами твоими блаженне Константине:  
прежде бо непокорные людие, сами крещение  
просиша и идолов сокрушиша. Мы же спасение  
получивше, вопием ти:

Радуйся, исправление неверных:

Радуйся, посрамление бесов.

Радуйся, прелести державу поправый:

Радуйся, идольскую лесь обличивый.

Радуйся, Православия проповедниче:

Радуйся, благочестия насадителю.

Радуйся, храмов Божиих зиждителю:

Радуйся, благолепия дому Господня рачителю.

Радуйся, священных прав церкви Божией блюстителю:

Радуйся, святыни ея верный хранителю.

Радуйся, неизнемогающий учителю веры:

Радуйся, присный наставниче.

Радуйся, преблаженне княже Константине, скорый помощниче и заступниче наш.

### **Кондак 7**

---

Хотя привести вся люди ко Христу, молился еси Богу, да открыет сердца их к приятию света истины: люди же убеждал еси прияти веру святую, яко залог счастья временнаго и вечнаго. Тем же молился и о нас преблаженне, да вопием вси чистою душею Богу: Аллилуиа.

### **Икос 7**

---

Дивное показа знамение Господь, егда невернии с оружием и дреколием устремишася на тя, ты же с молитвою пад пред иконою Богоматере, ходатайства у Сына Ея прося, абие услышал еси глас: дерзай Константине, аз есмь с тобою. Мы же прославляюще таковое о тебе Божие благоволение, радостно зовем:

Радуйся, на земли сподобивыйся слышати глас Самаго Бога:

Радуйся и дерзай, яко Господь с тобою, иже от не сущих вся приведый.

Радуйся, яко с тобою Господь, изведый древле Израиля из работы Египетския:

Радуйся, яко с тобою Господь, Амаликову силу в пустыни победивый.

Радуйся, яко с тобою Господь, снисхождением своим Небеса преклонивый:

Радуйся, яко с тобою Господь, духом силы Своея весь мир просветивый.

Радуйся, яко с тобою Господь, сильный в бранех:

Радуйся, яко с тобою Господь, всяку гордыню побеждаяй.

Радуйся, яко с тобою Господь, силу свою в немощи совершаяй:

Радуйся, яко тебе Господь прибежище и сила.

Радуйся, яко с тобою Господь, благоволивый просветити страну Муромскую:

Радуйся, яко с тобою Господь, новыя люди в Царство призвати изволивый.

Радуйся, преблаженне княже Константине, скорый помощниче и заступниче наш.

### **Кондак 8**

---

Странное чудо является: воины с оружием и дреколием пред безоружным князем, яко щит видяще точию в руках икону Богоматере, ниц повергаются: видевше бо икону сияющую яко солнце, лице князя яко лице ангела, с трепетом просяще крещения, возопиша Богу: Аллилуиа.

### **Икос 8**

---

Весь был еси в вышних, блаженне княже Константине, духом веселяся с ангелы, радующимися о едином грешнике кающемся, егда банею пакибытия обновляхуся людие Муромстии, и свет Небесный осия новокрещенныя люди. Мы же, радуяся смотрению Божию о тебе и людех, ублажаем тя, зовуще:

Радуйся, град сей от работы диаволу свободивый:

Радуйся, власть мысленного фараона сокрушивый.

Радуйся, к земле обетованной спасения приведый:

Радуйся, напитавый манною жизни люди твоя.

Радуйся, громом славы Божией неверие поразивый:

Радуйся, молниєю света благодати облиставый мрак заблуждения.

Радуйся, упование на Богоматерь возложивый:

Радуйся, Ея заступлению и покрову вверившийся.

Радуйся, научивый ведети Матерь Спасения:

Радуйся, проповедниче Ея милостей.

Радуйся, и град свой Ея ходатайству вручивый:

Радуйся, Божия благоволения ходатаю.

Радуйся, преблаженне княже Константине, скорый помощниче и заступниче наш.

### **Кондак 9**

---

Всякое место страны твоя освятити хотя, повелел еси ставити церкви во граде и селах, и монастыри мужеския и женския, да всюду воспевают Богу: Аллилуиа.

## Икос 9

Ветии многовещанная не возумеют прославити труды твоя, скорби и подвиги, яже подъял еси ради новокрещенных людей, врагов отражая, вражду умиряя, страну просвещая и устрояя, сырых призирая, неведущих вразумляя. Темже прославляя тя, взываем:

Радуйся, сырых защитниче:

Радуйся, вдов заступление.

Радуйся, нищих питателю:

Радуйся, скорбных утешителю.

Радуйся, неведущих вразумление:

Радуйся, младенцев воспитание.

Радуйся, страны Муромския ограждение:

Радуйся, града укрепление.

Радуйся, враждующих примирителю:

Радуйся, терпеливый в обидах.

Радуйся, славы Божией точию искавый:

Радуйся, вся земная в суету вменивый.

Радуйся, преблаженне княже Константине, скорый помощниче и заступниче наш.

## Кондак 10

---

Спасти хотя душу твою, до смерти подвизался еси подвигом добрым, течение скончал еси, веру соблюл еси: темже и уготован ти венец правды от Христа Бога нашего, яко возлюбльшему Его паче всего. Егоже и приял еси пресельшись от сея временная жизни к жизни вечней, и тамо вопиешу Богу: Аллилуиа.

## Икос 10

---

Стена еси и покров всем к заступлению твоему прибегающим, преблаженне Константине, дар чудодейственных благодати от Бога приемый. Темже буди и нам стена крепкая, и прибежище и заступление, в нуждах наших к тебе прибегающим, и вопиющим:

Радуйся, земное поприще жизни твоея ангельски совершивый:

Радуйся, величие сана княжескаго на земли и послушание вернаго раба Царю Небесному мудро совместивый.

Радуйся, святых детищ твоих, Михаила и Феодора, измлада Богу сочетаваый:

Радуйся, сердце свое и их в Руце Божии положивый.

Радуйся, винограда Христова делателю  
добрый:

Радуйся, князем похвало и царем славо.

Радуйся, яко земная храмина тела твоего  
покровом нетления одеяся:

Радуйся, яко святыя мощи твоя источают  
чудеса.

Радуйся, добрый и верный рабе Христов:

Радуйся, достойную мзду по делом твоим  
приявый.

Радуйся, ходатаю наш пред Богом:

Радуйся, присный молитвенниче о нас к Богу.

Радуйся, преблаженне княже Константине,  
скорый помощниче и заступниче наш.

### **Кондак 11**

---

Пение всеумиленное приносим ти,  
преблаженне Константине, просяще твоя  
помощи и ходатайства о нас к Богу: исцели  
наша немощи, якоже исцелил еси старицу  
Феодосию, четыре лета нему и глуху бывшу.  
Воздвигни нас от одра болезней, яко воздвигл  
еси боярскаго сына Иоанна, многая лета

болезнию одержима бывша. да спасаеми тобою,  
вопием Богу: Аллилуиа.

## Икос 11

---

Светоприемную свещу, во граде сем  
благодатию Божиею возженную, зрим святых  
мощей твоих: светит бо всем во мраке уныния  
сущим, озаряет скорбных, путеводит  
заблуждших, путь ко спасению и врачеванию  
всех немощей указуя. Темже прославляя Бога,  
даровавшего тебе благодать таковую, взываем  
ти:

Радуйся, скорбей сердца нашего успокоение  
благодатное:

Радуйся, горестей в жизни нашей  
услаждение.

Радуйся, кичений ума нашего умирение:

Радуйся, сомнений недоуменных разрешение.

Радуйся, страстей и желаний суетных  
обуздателю:

Радуйся, чистых намерений и благих  
начинаний руководителю.

Радуйся, совести нашей страже  
недремлющий:

Радуйся, ума нашего светильниче светлый.

Радуйся, воли нашея, яже ко благому, спутниче верный:

Радуйся, верный руководителю в путях жизни нашея.

Радуйся, жизньию своею образ благочестия нам оставивый:

Радуйся, верою своею правило веры нам показавый.

Радуйся, преблаженне княже Константине, скорый помощниче и заступниче наш.

### **Кондак 12**

---

Благодать данную тебе от Бога уведев, притече к раце твоей царь Иоанн, заступления и помощи прося от тебе к победе на агаряны: и победив врага, древле и с тобою враждовавшего, благодарственно припадая к мощем твоим, вопияше к Богу: Аллилуиа.

### **Икос 12**

---

Поюще велия твоя, преблаженне Константине, подвиги и труды в жизни сей, ублажаем приснопамятное успение твое, торжествуем и о Божественней славе твоей в

Небеснем Царствию, и припадающе к раце  
мощей твоих, взываем:

Радуйся, апостолов подражателю:

Радуйся, подвига мучеников ревнителю.

Радуйся, патриархов добродетели показавый:

Радуйся, князей украшение.

Радуйся, Церкви похвало:

Радуйся, верных утешение.

Радуйся, Российския страны украшение:

Радуйся, града Мурома ограждение.

Радуйся, в скорби и радости наше  
прибежище:

Радуйся, упование наше в ненадежных.

Радуйся, путешествующих добрый  
хранителю:

Радуйся, нападствуемых защите.

Радуйся, преблаженне княже Константине,  
скорый помощниче и заступниче наш.

### **Кондак 13**

О преславнии чудотворцы, святии  
благовернии князи, Константине, Михаиле и

Феодоре! Приимите ныне от нас сие хваление, и испросите нам, своим благоприятным ходатайством у Христа Бога, утверждение в вере и добрых делех, избавление от всех бед и напастей в жизни сей, а в смертном успении нашем благу спасения надежду, да сподобимся в радости вечней воспевати с вами Богу: Аллилуиа, Аллилуиа, Аллилуиа.

*(Этот кондак читается трижды, затем икос 1 и кондак 1)*

### **Молитва**

---

О храбрый воине и избранный воеводо Небеснаго Царя Христа! Победивый прелесть идолослужения силою Святаго Духа, и просветивый град Муром святым крещением, святой благоверный княже Константине! Усердно предстояще честней раце многоцелебных мощей твоих, со слезами молим тя, просяще прияти нам твоим к Богу ходатайством грехов оставление. Предстани, святе, яко имеяй дерзновение ко Святей Троице, и подвигни с собою на молитву преудобренныя своя две отрасли, плод честнаго семени твоего, благовернаго князя Михаила послушнаго тебе до смерти, и кровь свою пролиившаго за град сей,

и яко незлобиваго агнца заколена бывша (тщашеся бо тьмы душ обратити ко Господу спасаемых), и благовернаго князя Феодора, ревнителя благочестию. Испроси своими молитвами Богохранимей стране нашей и людем, мира, здравия, долгоденствия и на враги победы и одоления. Еще со слезами смиренно просим: сохраните, блаженнии, невредим град сей, егоже возлюбисте и свободисте от работы демонския. Обитель же сию, и живуция и труждающияся в ней, соблюдайте невредимо от всех козней и стрел демонских. Даруйте, святии, царствующим градом, граду сему, всякому граду и стране мирное и немятежное житие и изобилие плодов земных. По морю плавающим и путешествующим, и к раце мощей ваших с верою прибегающим, безбеднии правителие будите: злых свобождение, мирное и радостное в дома их возвращение, молитвами вашими даруйте, да вси с радостию зываем: О благовернии наши заступницы! Соблюдайте всех без напастей, да вси, прибегающе с верою к цельбоносней раце мощей ваших исцеление душам и телесем нашим приемлюще, прославляем вас, наша заступники, славяще

Отца и Сына и Святаго Духа, ныне и присно, и  
веки веков. Аминь.

